



REPUBLIKA E SHQIPËRISË

KOMISIONI I PAVARUR I KUALIFIKIMIT

Nr. 523 Akti

Nr. 603 Vendimi
Tiranë, më 19.12.2022

V E N D I M

Trupi gjykues i Komisionit të Pavarur të Kualifikimit, i përbërë nga:

Firdes Shuli	Kryesuese
Olsi Komici	Relator
Xhensila Pine	Anëtare

asistuar gjatë procesit të vendimmarrjes nga sekretarja gjyqësore, znj. Resilda Bilaj, në prani edhe të vëzhguesit ndërkombëtar, z. Steven Kessler, në datën 16.12.2022 mori në shqyrtim, mbi bazë dokumentesh, çështjen që i përket subjektit të rivlerësimit:

SUBJEKTI I RIVLERËSIMIT: **Znj. Zeta Tërpollari**, me detyrë gjyqtare pranë Gjykatës së Rrethit Gjyqësor Lushnjë.

BAZA LIGJORE: **Neni 179/b** i Kushtetutës së Republikës së Shqipërisë;
Neni G i Aneksit të Kushtetutës së Republikës së Shqipërisë;
Ligji nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”;
Ligji nr. 96/2016, “Për statusin e gjyqtarëve dhe prokurorëve në Republikën e Shqipërisë”;
Ligji nr. 44/2015, “Kodi i Procedurave Administrative i Republikës së Shqipërisë”;
Vendimi nr. 78, datë 12.12.2017, i Gjykatës Kushtetuese.

I. RRETHANAT E ÇËSHTJES

1. Subjekti i rivlerësimit Zeta Tërpollari gjatë periudhës së rivlerësimit kalimtar ka ushtruar detyrën e gjyqtares pranë Gjykatës së Rrethit Gjyqësor Lushnjë. Në zbatim të pikës 3 të nenit 179/b të Kushtetutës ky subjekt i është nënshtruar procesit të rivlerësimit *ex officio*.

2. Komisioni i Pavarur i Kualifikimit, në datën 15.6.2020, në përputhje me rregulloren “Për procedurat e zhvillimit të shortit në Komisionin e Pavarur të Kualifikimit”, zhvilloi procedurat e shpërndarjes së çështjeve me short, nga i cili rezultoi se subjekti i rivlerësimit Zeta Tërpollari do t’i nënshtrohej procesit nga trupi gjykues i përbërë nga komisionerët Xhensila Pine, Firdes Shuli dhe Olsi Komici. Relator i çështjes u zgjodh me short komisioneri Olsi Komici.

3. Pas hedhjes së shortit, bazuar në nenet 33, 39 dhe 43 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, u administruan raportet e hartuara nga institucionet: Inspektorati i Lartë i Deklarimit dhe Kontrollit të Pasurive dhe Konfliktit të Interesave (në vijim ILDKPKI); Drejtoria e Sigurimit të Informacionit të Klasifikuar (në vijim DSIK); dhe Këshilli i Lartë Gjyqësor (në vijim KLGJ).
4. Trupi gjykues i shortuar në Komisionin e Pavarur të Kualifikimit (në vijim Komisioni), me vendimin datë 2.7.2020, vendosi fillimin e hetimit administrativ të thelluar dhe të gjithanshëm, sipas nenit 45 të ligjit nr. 84/2016, me qëllim vlerësimin e të gjitha fakteve dhe rrethanave të nevojshme për procedurën e rivlerësimit, si dhe të caktojë kryesuese të trupit gjykues komisioneren Firdes Shuli. Të gjithë anëtarët e trupit gjykues deklaruan mosqenien në kushtet e konfliktit të interesit.
5. Në datën 2.7.2020 subjekti i rivlerësimit u njoftua nëpërmjet postës elektronike mbi fillimin e procesit të rivlerësimit kalimtar, përbërjen e trupit gjykues, si dhe iu kërkua të shprehej nëse ishte në kushtet e konfliktit të interesit me anëtarët e tij.
6. Në përgjigjen me *email*-in e datës 3.7.2020, subjekti nuk ka deklaruar konflikt interesi me asnjë prej anëtarëve të trupit gjykues.
7. Gjatë procesit të hetimit administrativ subjekti i rivlerësimit Zeta Tërpollari, me *email*-in e datës 28.10.2022, i ka kërkuar Komisionit ndërprerjen e procesit të rivlerësimit, duke bërë me dije se ka depozituar pranë KLGJ-së kërkesën e saj datë 27.10.2022 për dorëheqje nga funksioni i gjyqtarës dhe mbarimin e statusit të magjistrates, konform neneve 64 dhe 65 të ligjit nr. 96/2016, “Për statusin e gjyqtarit dhe prokurorit në Republikën e Shqipërisë”, për shkak të angazhimeve të saj profesionale jashtë vendit.
8. KLGJ-ja, me shkresën nr. *** prot., datë 10.11.2022, i njoftoi Komisionit kërkesën për dorëheqje të subjektit, datë 27.10.2022, protokolluar në KLGJ me nr. *** prot., datë 28.10.2022, si dhe me shkresën nr. *** prot., datë 23.11.2022, i njoftoi Komisionit vendimin nr. ***, datë 21.11.2022, të KLGJ-së, “Për mbarimin e statusit të magjistratit për gjyqtaren Zeta Tërpollari për shkak të dorëheqjes së saj”.
9. Gjykata Administrative e Apelit Tiranë, me shkresën nr. *** prot., datë 15.12.2022, i konfirmon Komisionit se ndaj vendimit nr. ***, datë 21.11.2022, të KLGJ-së, subjekti nuk ka ushtruar ankim.
10. Referuar shkresës së Gjykatës Administrative të Apelit Tiranë rezulton se subjekti i rivlerësimit nuk e ka ushtruar të drejtën e ankimit ndaj vendimit nr. ***, datë 21.11.2022, i cili ka marrë formë të prerë. Në këto kushte, Komisioni, në datën 15.12.2022 (ora 15:31), me anë të postës elektronike, i kërkoi subjektit që të konfirmojë vullnetin e saj për dorëheqje brenda datës 16.12.2022 (ora 14:00) dhe nëse dëshironte të dëgjohej në seancën dëgjimore, që më pas të caktonte një seancë dëgjimore për këtë qëllim¹.
11. Subjekti i rivlerësimit, me *email*-in e datës 15.12.2022 (ora 18:14), ka njoftuar Komisionin se konfirmon vullnetin e saj të lirë e të pavesuar në lidhje me dorëheqjen nga detyra e gjyqtarës të paraqitur pranë KLGJ-së dhe i qëndron kësaj dorëheqjeje, ndaj dhe nuk dëshiron që të marrë pjesë në seancë dëgjimore.

¹ Kur subjekti ka të drejtë të shprehet në lidhje me përfundimin e procesit të rivlerësimit për shkak të dorëheqjes nga statusi i magjistratit, duke mbajtur në konsideratë pikat 1 dhe 2 të nenit G të Aneksit të Kushtetutës.

II. ARSYET PËR PËRFUNDIMIN E PROCESIT TË RIVLERËSIMIT

12. Procesi i rivlerësimit ndaj subjektit të rivlerësimit Zeta Tërpollari ka filluar në respektim të pikës 3 të nenit 179/b të Kushtetutës së Republikën e Shqipërisë dhe të nenit 4 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

13. Trupi gjykues i Komisionit të Pavarur të Kualifikimit, pasi u njoh me rrethanat e çështjes, bazuar në provat e administruara më lart, konstaton se:

i) Subjekti i rivlerësimit ka ushtruar funksionin e gjyqtarës pranë Gjykatës së Rrethit Gjyqësor Tiranë dhe më pas pranë Gjykatës së Rrethit Gjyqësor Lushnjë.

ii) Procesi i rivlerësimit ndaj saj nuk ka përfunduar me vendim sipas pikës 1 të nenit 58 dhe me një nga masat disiplinore përkatëse sipas nenit 59 “konfirmimi në detyrë”, nenit 60 “pezullimi nga detyra dhe detyrimi për të ndjekur programin e trajnimit”, si dhe nenit 61 “shkarkimi nga detyra”.

iii) Subjekti i rivlerësimit Zeta Tërpollari ka ushtruar të drejtën për të dhënë dorëheqjen.

vi) Subjekti i rivlerësimit ka paraqitur dorëheqjen pranë Këshillit të Lartë Gjyqësor, i cili, me vendimin nr. ***, datë 21.11.2022, ka vendosur deklarin e mbarimit të statusit të magjistratit Zeta Tërpollari për shkak të dorëheqjes.

14. Neni 65 i ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, ka parashikuar procedurën që duhet ndjekur për mbarimin e statusit të magjistratit nëpërmjet dorëheqjes².

15. Neni G i Aneksit të Kushtetutës së Republikës së Shqipërisë ka parashikuar mundësinë e subjektit të rivlerësimit për të dhënë dorëheqjen, si vijon: *“1. Subjekti i rivlerësimit mund të japë dorëheqjen nga detyra dhe në këtë rast procesi i rivlerësimit ndërpritet. 2. Subjekti i rivlerësimit që dorëhiqet, sipas kësaj dispozite, nuk mund të emërohet gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm për një periudhë 15-vjeçare”.*

16. Vendimi nr. ***, datë 12.12.2017, i Gjykatës Kushtetuese, paragrafi 43, ndër të tjera, ka interpretuar lidhjen ndërmjet këtyre dy dispozitave, si vijon: *“[...] Neni 56 i ligjit nr. 84/2016 i jep mundësinë subjektit që dorëhiqet brenda afatit 3-mujor, të përfitojë pagesë kalimtare sipas parashikimeve ligjore në fuqi, mundësi të cilën nuk e përfitojnë subjektet që e japin dorëheqjen pas përfundimit të këtij afati. Gjykata thekson se, për sa kohë që subjekti i rivlerësimit është në detyrë dhe procesi i rivlerësimit nuk ka përfunduar ende, ai ka të drejtën të japë dorëheqjen dhe në këtë rast procesi i rivlerësimit ndërpritet, duke u zbatuar parashikimet e nenit G të Aneksit të Kushtetutës [...]”.*

17. Për zhvillimin e një procesi të rregullt ligjor dhe respektimin e së drejtës së subjektit për t’u dëgjuar, bazuar në nenin 55 të ligjit nr. 84/2016, meqenëse nga ana e KLGJ-së është konfirmuar dorëheqja e saj me vendimin nr. ***, datë 21.11.2022, Komisioni, nëpërmjet postës elektronike, në datën 15.12.2022 (ora 15:31) ka njoftuar subjektin nëse ka vullnetin të marrë

² “1. Magjistrati mund të kërkojë mbarimin e statusit nëpërmjet paraqitjes së dorëheqjes para këshillit përkatës. 2. Dorëheqja duhet të jetë me shkrim dhe nuk është e nevojshme të jetë e arsyetuar. Dorëheqja jep efektet në fund të muajit pasardhës, nga dita kur këshilli merr deklarin me shkrim të dorëheqjes. Mbarimi i statusit të magjistratit deklarohet me vendim të këshillit jo më vonë se dy javë nga mbarimi i statusit”.

pjesë në seancë dëgjimore dhe se fokusi i kësaj seance do të jetë përfundimi i procesit të rivlerësimit me aplikim të nenit G të Aneksit të Kushtetutës.

18. Subjekti i rivlerësimit, në datën 15.12.2022, nëpërmjet postës elektronike, ka njoftuar Komisionin se nuk dëshiron të marrë pjesë në seancën dëgjimore, duke kërkuar njëkohësisht edhe ndërprerjen e procesit të rivlerësimit, siç është shprehur në kërkesën e saj për dorëheqje.

19. Në këto kushte, trupi gjykues çmon se subjekti i rivlerësimit ka shfrytëzuar të drejtën që i njeh Kushtetuta dhe ligji për dorëheqje nga statusi i magjistratit. Ndërprerja e procesit të rivlerësimit për shkak të dorëheqjes së subjektit të rivlerësimit sjell si pasojë përfundimin e kësaj procedure administrative dhe, si rrjedhojë, subjekti i rivlerësimit humbet të drejtën për t'u emëruar gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm për një periudhë 15-vjeçare, sipas parashikimeve të pikës 2 të nenit G të Aneksit të Kushtetutës.

PËR KËTO ARSYE,

Trupi gjykues i Komisionit të Pavarur të Kualifikimit, mbështetur në paragrafët 1 dhe 2 të nenit G të Aneksit të Kushtetutës së Republikës së Shqipërisë, nenit 57 të ligjit nr. 84/2016, "Për rivlerësimin kalimtar të gjyqtarëve dhe prokurorëve në Republikën e Shqipërisë", si dhe në nenin 64 të ligjit nr. 96/2016, "Për statusin e gjyqtarëve dhe prokurorëve në Republikën e Shqipërisë",

V E N D O S I:

1. Të deklarojë ndërprerjen e procesit të rivlerësimit kalimtar për subjektin e rivlerësimit Zeta Tërpollari.
2. Ndalimin e emërimit të znj. Zeta Tërpollari si gjyqtar ose prokuror i çdo niveli, anëtar i Këshillit të Lartë Gjyqësor ose Këshillit të Lartë të Prokurorisë, Inspektor i Lartë e Drejtësisë ose Prokuror i Përgjithshëm, për një periudhë 15-vjeçare.
3. Ky vendim u njoftohet subjektit të rivlerësimit, Komisionerit Publik dhe vëzhguesve ndërkombëtarë dhe publikohet në faqen zyrtare të Komisionit, në përputhje me pikën 7 të nenit 55 të ligjit nr. 84/2016.
4. Kundër këtij vendimi lejohet ankimi në Kolegjin e Posaçëm të Apelit brenda 15 ditëve nga data e njoftimit të tij dhe duhet të dorëzohet në Komisionin e Pavarur të Kualifikimit.
Ky vendim u shpall në datën 19.12.2022.

ANËTARËT E TRUPIT GJYKUES

Firdes SHULI
Kryesuese

Xhensila PINE
Anëtare

Olsi KOMICI
Relator

Sekretare gjyqësore
Resilda Bilaj